CBETA電子佛典集成

CBETA Chinese Electronic Tripitaka Collection ebook

T26n1519

妙法蓮華經憂波提

舍

目次

- 編輯說明
- 章節目次

 - 。1<u>序品</u> 。2<u>方便品</u>
 - 。 3 譬喻品
- 巻目 次
- 001002贊助資訊

編輯說明

- 本電子書以「CBETA 電子佛典集成 Version 2022. Q4」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta.org 回報。
- <u>版權所有</u>,歡迎自由流通,但禁止營利使用。

No. 1519 [No. 1520] 妙法蓮華經憂波提舍卷上

大乘論師婆藪槃豆釋

後魏北天竺三藏菩提留支共沙門曇林等譯

頂禮正覺海, 淨法無為僧, 為深利智者, 開示毘伽典。 祇虔牟尼尊, 及菩薩聲聞, 令法自他利, 略出勒伽辯。 歸命過未世, 現在佛菩薩, 弘慈降神力, 願施我無畏, 大悲止四魔, 護菩提增長。

妙法蓮華經序品第一

如是我聞:一時佛住王舍城耆闍崛山中,與大比丘眾萬二千人俱,皆是阿羅漢,諸漏已盡,無復煩惱,心得自在,善得心解脫、善得慧解脫,心善調伏,人中大龍,應作者作,所作已辦,離諸重擔,逮得己利,盡諸有結,善得正智心解脫,一切心得自在,到第一彼岸。菩薩摩訶薩八萬人,皆於阿耨多羅三藐三菩提不退轉,皆得陀羅尼、大辯才樂說,轉不退轉法輪,供養無量百千諸佛,於諸佛所種諸善根,常為諸佛之所稱歎,以大慈悲而修身心,善入佛慧通達大智到於彼岸,名稱普聞無量世界,能度無數百千眾生。

釋曰:此經法門初第一品,示現七種功德成就,此義應知。何等為七?一者序分成就;二者眾成就;三者如來欲說法時至成就;四者依所說法威儀隨順住成就;五者依止說因成就;六者大眾現前欲聞法成就;七者文殊師利菩薩答成就。

序分成就者,此法門中示現二種勝義成就,此義應知。何等為二? 一者示現諸法門中最勝義成就;二者示現自在功德義成就。如王舍城勝於一切諸餘城舍,耆闍崛山勝餘諸山,顯此法門最勝義故。如經「婆伽婆住王舍城耆闍崛山中」故。

眾成就者,有四種義故,成就示現應知。何等為四?一者數成就; 二者行成就;三者攝功德成就;四者威儀如法住成就。

數成就者,諸大眾無數故。行成就者有四種:一者調諸聲聞修小乘行;二者調諸菩薩修大乘行;三者調諸菩薩神通自在隨時示現,能修行大乘,如颰陀波羅菩薩等十六大賢士,具足菩薩不可思議事,

而常示現種種形相,謂優婆塞、優婆夷、比丘、比丘尼等;四者謂 出家聲聞威儀一定,不同菩薩故。

「皆是阿羅漢」等,有十六句,示現聲聞功德成就。

「皆於阿耨多羅三藐三菩提不退轉」等,有十三句,示現菩薩功德成就。

聲聞功德成就者,彼十六句三門攝義示現應知。何等三門?一者上 上起門;二者總別相門;三者攝取事門。

上上起門者,謂諸漏已盡故,名為阿羅漢。以心得自在故,名為諸漏已盡。以無復煩惱故,名為心得自在。以善得心解脫、善得慧解脫故,名為心得自在。以遠離能見所見故,名為無復煩惱。以善得心解脫、善得慧解脫故,名為心善調伏。人中大龍者,行諸惡道如平坦路無所拘礙。應行者已行,應到處已到故。應作者作,人中大龍已得對治降伏煩惱之怨敵故。所作已辦者,更不後生,如相應事已成就故。離諸重擔者,以應作者作、所作已辦,後生重擔已捨離故。逮得己利者,已捨重擔,證涅槃故。盡諸有結者,以逮得己利,斷諸煩惱因故。善得正智心解脫者,諸漏已盡故。一切心得自在者,善知見道修道智故。到第一彼岸者,善得正智心解脫、善得神通無諍三昧等諸功德故。大阿羅漢等者,心得自在到彼岸故。眾所知識者,諸王、王子、大臣、人民、帝釋、天王、梵天王等皆識知故。又復聲聞、菩薩、佛等是勝智者,彼勝智者皆悉善知,是故名為眾所知識。

總別相門者,「皆是阿羅漢」等十六句。初句是總,餘句別故。彼阿羅漢名之為應,有十五種應義應知。何等十五?一者應受飲食臥具供養恭敬等故;二者應將大眾教化一切故;三者應入聚落城邑等故;四者應降伏諸外道等故;五者應以智慧速觀察法故;六者應不疾不遲說法如法相應不疲惓故;七者應靜坐空閑處,飲食衣服一切資生不積不聚,少欲知足故;八者應一向行善行,不著諸禪故;九者應行空聖行故;十者應行無相聖行故;十一者應行無願聖行故;十二者應降伏世間禪淨心故;十三者應起諸通勝功德故;十四者應證第一義勝功德故;十五者應如實知同生諸眾得諸功德,為利益一切諸眾生故。

攝取事門者,此十五句攝取十種功德應知,示現可說果、不可說果故。何等為十?一者攝取德功德二句示現,如經「諸漏已盡無復煩惱」故。二者三句攝取諸功德:一句降伏世間功德,如經「心得自在」故;二句降伏出世間學人功德,如經「善得心解脫、善得慧解脫」故。三者攝取不違功德,隨順如來教作故,如經「心善調伏」故。四者攝取勝功德,如經「人中大龍」故。五者攝取所應作勝功德,所應作者謂能依法供養恭敬尊重如來,如經「應作者作」故。

六者攝取滿足功德,滿足學地故,如經「所作已辦」故。七者三句攝取過功德:一者過愛;二者過求命供養恭敬;三者過上下界,已過學地故。如經「離諸重擔」故,「逮得己利」故,「盡諸有結」故。八者攝取上上功德,如經「善得正智心解脫」故。九者攝取應作利益眾生功德,如經「一切心得自在」故。十者攝取上首功德,如經「到第一彼岸」故。

菩薩功德成就者,彼十三句,二門攝義示現應知。何等二門?一者 上支下支門;二者攝取事門。

上支下支門者,所謂總相、別相,此義應知。「皆於阿耨多羅三藐三菩提不退轉」者是總相,餘者是別相。彼不退轉十種示現,此義應知。何等為十?一者住聞法不退轉,如經「皆得陀羅尼」故。二者樂說不退轉,如經「大辯才樂說」故。三者說不退轉,如經「轉不退轉法輪」故。四者依止善知識不退轉,以身心業依色身攝取故,如經「供養無量百千諸佛」故,「於諸佛所種諸善根」故。五者斷一切疑不退轉,如經「常為諸佛之所稱歎」故。六者為何等何等事說法,入彼彼法不退轉,如經「以大慈悲而修身心」故。七者入一切智如實境界不退轉,如經「善入佛慧」故。八者依我空法空不退轉,如經「通達大智」故。九者入如實境界不退轉,如經「到於彼岸」故。十者作所應作不退轉,如經「能度無數百千眾生」故。

攝取事門者,示現諸菩薩住何等清淨地中、以何等方便、於何等境界中,作所應作故。地清淨者,八地已上三地無相行寂靜清淨故。方便者有四種:一者攝取妙法方便,住持妙法以樂說力為人說故。二者攝取善知識方便,以依善知識作所應作故。三者攝取眾生方便,以不捨眾生故。四者攝取智方便,以教化眾生令入彼智故。又復更有攝取事門,示現諸地攝取勝功德不同二乘諸功德故。謂第八地中無功用智不同下上故。不同下者,下功用行不能動故;不同上者,上無相行不能動自然而行故。第九地中得勝進陀羅尼門,具足四無礙自在智故。第十地中不退轉法輪得受佛位,如轉輪王之太子故,以得同攝功德義故。

攝功德成就者,示現依何處、依何心、依何智、依何等境界行、依何等能辦故。依何處者,依善知識故。依何心者,依教化眾生心畢竟利益一切眾生故。依何智者,依三種智:一者授記密智;二者諸通智;三者真實智。依何等境界行、依何等能辦者,即三種智所攝應知。威儀如法住成就者,四種示現。何等為四?一者眾圍繞;二者前後;三者供養恭敬;四者尊重讚歎。如經「爾時世尊四眾圍繞,供養、恭敬、尊重讚歎」故。

如來欲說法時至成就者,為諸菩薩說大乘經故。此大乘修多羅有十 七種名,顯示甚深功德應知。何等十七?云何顯示?一名無量義經 者,成就字義故,以此法門說彼甚深法妙境界故;彼甚深法妙境界 者,諸佛如來最勝境界故。二名最勝修多羅者,於三藏中最勝妙 藏,此法門中善成就故。三名大方廣經者,無量大乘門中善成就 故,隨順眾生根住持成就故。四名教菩薩法者,以為教化根熟菩薩 隨順法器善成就故。五名佛所護念者,以依如來有此法故。六名一 切諸佛祕密法者,此法甚深唯佛知故。七名一切諸佛之藏者,如來 功德三昧之藏在此經故。八名一切諸佛祕密處者,以根未熟眾生等 非受法器不授與故。九名能生一切諸佛經者,聞此法門能成諸佛大 菩提故。十名一切諸佛之道場者,以此法門能成諸佛阿耨多羅三藐 三菩提,非餘修多羅故。十一名一切諸佛所轉法輪者,以此法門能 破一切諸障礙故。十二名一切諸佛堅固舍利者,謂如來真實法身於 此修多羅不敗壞故。十三名一切諸佛大巧方便經者,依此法門成大 菩提已,為眾生說天人聲聞辟支佛等諸善法故。十四名說一乘經 者,以此法門顯示如來阿耨多羅三藐三菩提究竟之體,彼二乘道非 究竟故。十五名第一義住者,以此法門即是諸佛如來法身究竟住處 故。十六名妙法蓮華經者,有二種義。何等二種?一者出水義,以 不可盡出離小乘泥濁水故。又復有義,如彼蓮華出於泥水喻,諸聲 聞得入如來大眾中坐,如諸菩薩坐蓮華上,聞說如來無上智慧清淨 境界,得證如來深密藏故;二華開義,以諸眾生於大乘中其心怯弱 不能生信,是故開示諸佛如來淨妙法身令生信心故。十七名最上法 門者,攝成就故。攝成就者,攝取無量名句字身,有頻婆羅阿閦婆 等舒盧迦故。此十七句法門是總,餘句是別。如經「為諸菩薩說大 乘經,名無量義」如是等故。

依所說法威儀隨順住成就者,示現依何等何等法說法?依三種法故:一者依三昧成就。三昧成就,二種示現:一者成就自在力,身心不動故;二者離一切障,隨自在力故。此自在力復有二種:一為隨順眾生不見對治攝取覺菩提分法故;二為對治無量世來堅執煩惱故。如經「佛說此經已結加趺坐,入於無量義處三昧身心不動」如是等故。二者依器世間,三者依眾生世間,震動世界及知過去無量劫事如是等故。如經「是時天雨曼陀羅花,次第乃至歡喜合掌一心觀佛」故。

依止說因成就者,為諸大眾示現異相不思議事,大眾見已生希有心,渴仰欲聞生如是念:如來今者應為我說。故名依止說因成就。 是故如來放大光明,示現他方諸世界中種種諸事故,先為大眾示現 外事六種震動等,次為示現此法門中內證甚深微密之法,又依器世 間、眾生世間,數種種、量種種,具足煩惱差別、具足清淨差別、 佛法弟子差別示現三寶故。復乘差別,有世界有佛、有世界無佛,令眾生見修行者未得果、得道者已得果。如經「諸修行得道者」故。數種種者,示現種種觀故。略說四種觀:一者食;二者聞法;三者修行;四者樂。如經「爾時佛放眉間白毫相光,次第乃至以佛舍利起七寶塔」故。行菩薩道者,教化眾生依四攝法方便攝取,此義應知。如經所說當自推取。

自此以下,示現大眾欲聞現前成就。問一人者,多人欲聞生希有心,是故唯問文殊師利,如是示現世尊弟子隨順於法不相違故。今佛世尊現神變相者為何等義?為說大法故,現大相以為說因。現大相者,為說妙法蓮華經故現大瑞相,為說如來所得妙法不可思議等文字章句故。有二種義,是故仰推文殊師利。何等為二?一者現見諸法故;二者離諸因緣,唯自內心成就彼法故。示現種種諸瑞相者,以為示現彼彼事故。如彼事相現沒住滅應當善知。以文殊師利能記彼事故,以文殊師利所作成就、因果成就現見彼法故。所作成就者,此有二種:一者功德成就;二者智慧成就。因成就者,一切智成就故。又復有因,謂緣因故。緣因成就者,眾相具足故。果成就者,說大法故。種種異異佛國土者,為此示現彼國土中種種異異差別應知。淨妙國土者,謂無煩惱眾生住處。如經「照於東方萬八千世界,次第乃至悉見彼佛國界莊嚴」故。如來為上首者,諸菩薩等依如來住故,以彼如來於彼國土諸大眾中得自在故。如經「又見彼土現在諸佛」如是等故。

自此以下次明聖者。文殊師利以宿命智現見過去因相果相成就十事如現在前,是故能答彌勒菩薩。云何現見過去因相?謂文殊師利自見己身,曾於彼彼諸國土中處處修行、種種行事故。云何現見過去果相?謂文殊師利自見己身,是過去世妙光菩薩,於彼佛所聞此法門,為眾生說故。何等名為成就十事?一者現見大義因成就;二者現見世間文字章句意甚深因成就;三者現見希有因成就;四者現見勝妙因成就;五者現見受用大因成就;六者現見攝取一切諸佛轉法輪因成就;七者現見善堅實如來法輪因成就;八者現見能進入因成就;九者現見憶念因成就;十者現見自身所經事因成就。

大義因成就者,八句示現此義應知。何等為八?一者欲論大法;二者欲雨大法雨;三者欲擊大法鼓;四者欲建大法幢;五者欲然大法 燈;六者欲吹大法鳌;七者欲不斷大法鼓;八者欲說大法。此八句欲示現如來欲論大法等故。

何等名為八種大義?謂有疑者為斷疑故。已斷疑者增長淳熟彼智身故。根淳熟者為說二種微密境界:一者聲聞微密境界;二者菩薩微密境界。大法鼓者二句,示現以遠聞故。入密境界者,令彼進取上上清淨義故。進取上上清淨義者,令彼進取一切種智得現見故。令

彼進取一切種智得現見者,為一切法建立名字章句義故。建立名字章句義者,令入不可說證智轉法輪故。

現見世間名字章句意甚深因成就者,如經「我於過去諸佛曾見此瑞,次第乃至故現斯瑞」故。

現見希有因成就者,以無量時不可得故。不可思議不可稱不可量者,示現過彼阿僧祇劫不可得故。又復示現五種劫故,所謂一夜、二晝、三月、四時、五年,示現無量無邊諸法故。如經「如過去無量無邊不可思議阿僧祇劫,爾時有佛號日月燈明,次第乃至令得阿耨多羅三藐三菩提,成一切種智」故。

現見勝妙因成就者,示現諸佛及諸菩薩自受用故。如經「次復有佛 亦名日月燈明,次第乃至所可說法初中後善」故。

現見受用大因成就者,是時王子受勝妙樂各捨出家,復彼大眾於爾許時心不疲<mark>倦</mark>故。如經「其最後佛未出家時,次第乃至佛授記已便於中夜入無餘涅槃」故。

現見攝取一切諸佛轉法輪因成就者,法輪不斷故。如經「佛滅度後妙光菩薩持妙法蓮華經滿八十小劫為人演說」故。

現見善堅實如來法輪因成就者,佛滅度後無量時說故。如經「日月 燈明佛八子皆師妙光,次第乃至皆令堅固阿耨多羅三藐三菩提心」 故。

現見能進入因成就者,彼諸王子得大菩提故。如經「是諸王子,次 第乃至皆成佛道」故。

現見憶念因成就者,為他說法利益他故。如經「其最後成佛者名曰 然燈,次第乃至尊重讚歎」故。

現見自身所經事因成就者,以自身受勝妙樂故。如「經彌勒當知, 次第乃至佛所護念」故。汝號求名者示現知彼過去事故,又復示現 今得彼法皆具足故。又依義攝三故:一、與說故,如經「今佛世尊 欲說大法等」故。二、成如實說故,如經「我於過去曾見等」故。 三、令待說故,如經「諸人今當知等」故。自此已下示現所說法因 果相應知。

方便品第二

經曰:爾時世尊入甚深三昧正念不動,以如實智觀,從三昧安詳而起。起已即告尊者舍利弗言:「舍利弗!諸佛智慧甚深無量,其智慧門難見難覺難知難解難入,如來所證一切聲聞辟支佛等所不能知。何以故?舍利弗!如來、應、正遍知已曾親近供養無量百千萬億無數諸佛,於百千億那由他佛所盡行諸佛所修阿耨多羅三藐三菩提法。舍利弗!如來已於無量百千億那由他劫勇猛精進,所作成

就、名稱普聞。舍利弗!如來畢竟成就希有之法。舍利弗!難解之法如來能知。舍利弗!難解法者,諸佛如來隨宜所說意趣難解,一切聲聞辟支佛等所不能知。何以故?舍利弗!諸佛如來自在說因成就故。舍利弗!如來成就種種方便、種種知見、種種念觀、種種言辭。舍利弗!吾從成佛已來,於彼彼處廣演言教,無數方便引導眾生於諸著處令得解脫。舍利弗!如來知見方便到於彼岸。舍利弗!如來知見廣大深遠、無障無礙,力、無所畏、不共法、根、力、菩提分、禪定、解脫三昧三摩跋提皆已具足。舍利弗!諸佛如來深入無際,成就一切未曾有法。舍利弗!如來能種種分別巧說諸法,言辭柔軟悅可眾心。止。舍利弗!如來能種種分別巧說諸法,言辭柔軟悅可眾心。止。舍利弗!如來能種種分別巧說諸法,言辭柔軟悅可眾心。止。舍利弗!如來能種種分別巧說諸法,言不有難解之法。舍利弗!唯佛與佛說法,諸佛如來能知彼法究竟實相。舍利弗!唯佛如來知一切法。舍利弗!唯佛如來能說一切法,何等法?云何法?何似法?何相法?何體法?何等、云何、何似、何相、何體,如是等一切法,如來現見。」

釋曰:「爾時世尊入甚深三昧正念不動,以如實智觀從三昧安詳而起,起已即告舍利弗」者,示現如來得自在力故、如來入定無能驚寤故。何故唯告尊者舍利弗、不告其餘聲聞等者?隨深智慧與如來相應故。何故不告諸菩薩者?有五種義:一者為諸聲聞所應事故;二者為諸聲聞迴心趣向大菩提故;三者護諸聲聞恐怯弱故;四者為令餘人善思念故;五者為諸聲聞不起所作已辦心故。

「諸佛智慧甚深無量」者,為諸大眾生尊重心,畢竟欲聞如來說 故。言甚深者,顯示二種甚深之義應如是知。何等為二?一者證甚 深,謂諸佛智慧甚深無量故;二者阿含甚深,謂智慧門甚深無量 故。言甚深者此是總相,餘別相。證甚深者五種示現:一者義甚 深,謂依何等義甚深故;二者實體甚深;三者內證甚深;四者依止 甚深;五者無上甚深。何者甚深?謂大菩提。大菩提者,如來所證 阿耨多羅三藐三菩提故。云何甚深?一切聲聞辟支佛等所不能知故 名甚深。言智慧者,謂一切種、一切智義故。如經「諸佛智慧甚深 無量,其智慧門難見難覺難知難解難入,一切聲聞辟支佛等所不能 知」故。阿含甚深者,八種示現:一者受持讀誦甚深,如經「已曾 親近供養無量百千萬億無數諸佛」故。二者修行甚深,如經「於百 千萬億那由他佛所,盡行諸佛所修阿耨多羅三藐三菩提法」故。三 者果行甚深,如經「舍利弗!如來已於無量百千億那由他劫勇猛精 進所作成就」故。四者增長功德心甚深,如經「名稱普聞」故。五 者快妙事心甚深,如經「舍利弗!如來畢竟成就希有之法」故。六 者無上甚深,如經「舍利弗!難解之法如來能知」故。七者入甚 深,入甚深者,名字章句意難得故,自以住持不同外道說因緣法, 名為甚深。如經「舍利弗!難解法者,諸佛如來隨官說法意趣難

解」故。八者不共聲聞辟支佛所作住持甚深,如經「一切聲聞辟支佛等所不能知」故。 妙法蓮華經憂波提舍卷上

大乘論師婆藪槃豆釋

後魏北天竺三藏菩提留支共沙門曇林等譯

方便品之餘

如是已說妙法功德具足,次說如來法師功德成就應知。如經「何以故?舍利弗!諸佛如來自在說因成就」故。如來成就四種功德,故能度眾生。何等為四?一者住成就,如經「舍利弗!如來成就種種方便」故。種種方便者,謂從兜率天中退沒乃至示現入涅槃故。二者教化成就,如經「種種知見」故。種種知見者,示現染淨諸因故。三者功德畢竟成就,如經「種種念觀」故。種種念觀者,以說彼法成就因緣,如法相應故。四者說成就,如經「種種言辭」故。種種言辭者,以四無礙智依何等何等名字章句、隨何等何等眾生能受而為說故。

又復有義,種種方便者,種種方便示現外道所有邪法如是如是種種過失故,種種方便示現諸佛所有正法如是如是種種功德故。如經

「舍利弗!吾從成佛已來,廣演言教,無數方便引導眾生於諸著處令得解脫」故。又無數方便者,方便令入諸善法故。又方便者,斷諸疑故。又方便者,令入增上勝智中故。又方便者,依四攝法攝取眾生令得解脫故。諸著處者,彼處處著,或著諸界、或著諸地、或著諸分、或著諸乘。著諸界者,謂著欲、色、無色界故。著諸地者,謂著界故,依於三昧取禪定地,謂初禪地乃至非想非非想地,及取滅盡定地等故。著諸分者,謂著在家、出家分故。著在家分者,著已同類作種種業邪見等故。著出家分者,著名聞利養種種覺煩惱等故。著諸乘者,著聲聞乘、菩薩乘故。著聲聞乘者,樂持小乘戒,求須陀洹、斯陀含、阿那含、阿羅漢等故。著大乘者,謂著利養供養恭敬等故,著分別觀種種法相乃至佛地故。

又復種種知見者,自身成就不可思議勝妙境界,與諸聲聞菩薩等故。如經「舍利弗!如來知見方便到於彼岸」故。到彼岸者,勝餘一切諸菩薩故。

又復種種念觀者,如經「舍利弗!如來知見廣大深遠無障無礙,力、無所畏、不共法、根、力、菩提分、禪定、解脫三昧三摩跋提皆已具足」故。又第一、成就可化眾生,依善知識而成就故;第二、成就根熟眾生,令得解脫故;第三、成就力家自在,淨降伏故。第四、成就復有七種:一者種種成就,如經「舍利弗!諸佛如來深入無際,成就一切未曾有法」故。二者言語成就,謂得五種美

妙音聲言語說法,如經「如來能種種分別巧說諸法,言辭柔軟悅可 眾心」故。三者相成就,如經「止。舍利弗!不須復說」故,有法 器眾生心已滿足故。四者堪成就,所有一切可化眾生皆知如來成就 希有勝功德能說法故。如經「舍利弗!佛所成就第一希有難解之 法」故。五者無量種成就,說不可盡。如經「舍利弗!唯佛與佛說 法,諸佛如來能知彼法究竟實相」故。言實相者,謂如來藏法身之 體不變義故。六者覺體成就,如來所說一切諸法,唯佛如來自證得 故。如經「舍利弗!唯佛如來知一切法」故。七者隨順眾生意為說 修行法成就,彼法何等如是等故。如經「舍利弗!唯佛如來能說一 切法」故。第一種種法門攝取眾生故;第二令不散亂住故;第三令 取故;第四令得解脫故;第五令彼修行成就得對治法故;第六令彼 修行進趣成就故;第七令得修行不退失故。此七種法,為諸眾生自 身所作善成就故。又與教化令成就者,與二種法令彼成就。何等為 二?一、與證法;二、與說法。一與證法令成就者,謂依證法而授 與故;二與說法令成就者,謂依說法而說與故。此二種法如向前 說。依此二法有何次第而得修行?即彼前文重說應知。

又依證法復有五種:一者何等法;二者云何法;三者何似法;四者何相法;五者何體法故。何等法者,謂聲聞法、辟支佛法、諸佛法故。云何法者,謂起種種諸事說故。何似法者,依三種門得清淨故。何相法者,謂三種義一相法故。何體法者,無二體故。無二體者,謂無量乘唯一佛乘,無二乘故。

又復有義:何等法者,所謂有為、無為法等。云何法者,謂因緣法、非因緣法等。何似法者,所謂常法、無常法等。何相法者、謂生等三相法、不生等三相法。何體法者,謂五陰體、非五陰體故。又何似法者,謂無常法、有為法、因緣法。又何相法者,謂可見相等法。又何體法者,所謂五陰能取可取,以五陰是苦集體故,又五陰者是道諦體故。復有異義依說法說:何等法者,所謂名、句、字身等故。云何法者,謂依如來所說法故。何似法者,謂能教化可化者故。何相法者,依音聲取,以依音聲取彼法故。何體法者,謂假名體,法相義故。

自此已下,次依示現三種義說:一者決定義;二者疑義;三者依何事疑義,應當善知。決定義者,有聲聞方便得證深法作決定心,於聲聞道中得方便涅槃證故。如是二種證法,示現有為、無為法故。如經「爾時大眾中有諸聲聞漏盡阿羅漢,次第乃至亦得此法到於涅槃」故。言疑義者,謂諸聲聞、辟支佛等不能得知,是故生疑。如經「而今不知是義所趣」故。依何事疑義者,聞如來說聲聞解脫與我解脫不異不別是故生疑,謂生疑者生因中疑:此事云何?此事云何?此以如來數數為說甚深境界,前說甚深、後說甚深,不同聲

聞,以如是故生疑。如經「爾時舍利弗知四眾心疑,次第乃至而說 偈言」。

自此以下,次依示現四種事說:一者決定心;二者因授記;三者取授記;四者與授記,應當善知。云何決定心?已生驚怖者令斷驚怖,以為利益二種人故,是故如來有決定心。此驚怖者五種應知:一者損驚怖,謂小乘眾生如所聞聲取以為實,謗無大乘起如是心:如來說言阿羅漢果究竟涅槃。我畢竟取如是涅槃,是故羅漢不入涅槃。如是驚怖。

二者多事驚怖,謂大乘眾生聞菩薩道劫數長遠種種苦行,起如是心:佛道長遠,我於無量無邊劫中行菩薩行久受勤苦。如是念故生驚怖心,以是故起取異乘心。如是驚怖。

三者顛倒驚怖,謂心分別有我我所種種身見諸不善法。如是驚怖。 四者心悔驚怖,謂大德舍利弗等起如是心言:我不應修證如是小乘 之法。如是悔已心即自止,即此心悔名為驚怖。此義應知。

五者誑驚怖,謂增上慢聲聞之人起如是心:云何如來誑於我等?如 是驚怖。

因授記者,如經「止止舍利弗!不須復說。若說是事,一切世間諸天人等皆生驚怖」故。此因授記皆生驚怖者有三種義:一者欲令彼諸大眾推求甚深妙境界故;二者欲令彼諸大眾生尊重心,畢竟欲聞如來說故;三者欲令諸增上慢聲聞之人捨離法座而起去故。第二請者,示現過去無量諸佛教化眾生。如經「是會無數次第,乃至聞佛所說則生敬信」故。第三請者,示現今佛教化眾生。如經「今此會中如我等比,次第乃至長夜安隱多所饒益」故。取授記者,以舍利弗等欲得授記。如經「佛告舍利弗:汝已三請,豈得不說?汝今諦聽」如是等故。

與授記者, 六種應知: 一者未聞令聞; 二者說; 三者依何等義; 四者令住; 五者依法; 六者遮。未聞者令聞, 如經「舍利弗! 如是妙法, 諸佛如來時乃說之, 如優曇鉢華」如是等故。

說者,如經「舍利弗!我以無數方便,種種因緣譬喻言辭演說諸 法」如是等故。種種因緣者,所謂三乘。彼三乘者,唯有名字章句 言說,非有實義,以彼實義不可說故。

依何等義者,如經「舍利弗!諸佛世尊唯以一大事因緣故出現於世」如是等故。一大事者,依四種義應當善知。何等為四?一者無上義,唯除如來一切智知,更無餘事。如經「欲開佛知見令眾生知得清淨故出現於世」故。佛知見者,如來能證以如實知彼深義故二者同義,謂諸聲聞、辟支佛、佛法身平等。如經「欲示眾生佛知見故出現於世」故。法身平等者,佛性、法身無差別故。三者不知義,謂諸聲聞、辟支佛等,不能知彼真實處故。此言不知真實處

者,不知究竟唯一佛乘故。如經「欲令眾生悟佛知見故出現於世」故。四者令證不退轉地,示現欲與無量智業故。如經「欲令眾生入佛知見故出現於世」故。又復示者,為諸菩薩有疑心者,令知如實修行故。又悟入者,未發心者令發心故,已發心者令入法故。又復悟者,令外道眾生生覺悟故。又復入者,令得聲聞小乘果者入菩提故。

令住者,如經「舍利弗!但以一佛乘故為眾生說法」故。 依法者,如經「舍利弗!過去諸佛以無量無數方便,種種譬喻因緣 念觀方便說法,是法皆為一佛乘故」如是等故。言譬喻者,如依牛 故得有乳、酪、生酥、熟酥及以醍醐。此五味中醍醐第一,小乘不 如,其猶如乳;大乘為最,猶如醍醐。此喻所明大乘無上,諸聲聞 等亦同大乘無上義故。聲聞同者,此中示現諸佛如來法身之性,同 諸凡夫、聲聞之人、辟支佛等,法身平等無差別故。此義皆是譬喻 示現因緣之義,如前所說。言念觀者,小乘諦中人無我等;大乘諦 中真如、實際、法界、法性,及人無我、法無我等種種觀故。言方 便者,於小乘中觀陰界入,厭苦離苦得解脫故;於大乘中諸波羅 蜜,以四攝法攝取自身他身,利益對治法故。遮者,如經「舍利 弗!十方世界中尚無二乘,何況有三」如是等故。無二乘者,謂無 二乘所得涅槃,唯有如來證大菩提,究竟滿足一切智慧名大涅槃, 非諸聲聞、辟支佛等有涅槃法,唯一佛乘故。一佛乘者,依四種義 說,應當善知。如來依此六種授記,是故前說何等法、云何法、何 似法、何相法、何體法,如是示現。何等法者,謂未曾聞故。云何 法者,謂種種言辭譬喻顯說故。何似法者,所謂唯為一大事故。何 相法者,為隨眾生器說諸佛法故。何體法者,所謂唯有一乘體故。 一乘體者,所謂諸佛如來平等法身;彼諸聲聞、辟支佛乘非彼平等 法身之體,以因果行觀不同故。

自此以下,如來說法為斷四種疑心應知。何等四疑?一、疑何時說;二、疑云何知是增上慢人;三、疑云何堪說;四、疑云何如來不成妄語。何時說者,諸佛如來於何等時起種種方便說法為斷此疑。如經「舍利弗!諸佛出於五濁惡世,所謂劫濁」如是等故。云何知是增上慢人者,如來不為增上慢人而說諸法,云何知彼是增上慢?為斷此疑,如經「若有比丘實得阿羅漢者,若不信是法無有是處」如是等故。云何堪說者,從佛聞法而起謗心:如來應是不堪說人,云何不成不堪說人?為斷此疑,如經「除佛滅度後現前無佛」如是等故。云何如來不成妄語者,此以如來先說法異、今說法異,可是等故。云何如來不成妄語者,此以如來先說法異、今說法異,如是等故。云何如來不成妄語,為斷此疑,如經「舍利弗!汝等應當一心信解受持佛語,諸佛如來言無虛妄,無有餘乘唯一佛乘」故。

「乃至童子戲聚沙為佛塔,如是諸人等皆已成佛道」者,謂發菩提心行菩薩行者,所作善根能證菩提,非諸凡夫及決定聲聞本來未發菩提心者之所能得。如是乃至小低頭等,皆亦如是。

譬喻品第三

尊者舍利弗所說偈言:

「金色三十二, 十力諸解脫, 同共一法中, 而不得此事。 八十種妙好, 十八不共法, 如是等功德, 而我皆已失。」

釋曰:此偈示現何義?尊者舍利弗自呵責身言:我不見諸佛、不往諸佛所及聞佛說法,不供養恭敬諸佛,無利益眾生事,於未得法退。尊者舍利弗作如是等呵責自身。不見佛者,示現不見諸佛如來大人之相,不生恭敬供養心故。往佛所者,示現教化眾生力故。放金色光明者,示現見佛自身異身獲得無量諸功德故。聞說法者,示現能作一切眾生之利益故。力者,示現眾生有疑,依十種力斷彼疑故。供養者,示現能教化眾生力故。十八不共法者,示現遠離諸障礙故。恭敬者,示現出生無量福德,依如來教得解脫故。以人無我及法無我,一切諸法悉皆平等,是故尊者舍利弗自呵責身言:我未得如是法故。於未得中退故。

自此以下,次為七種具足煩惱染性眾生說七種喻,對治七種增上慢心,此義應知。

又復次為三種染慢無煩惱人三昧解脫身等染慢,對治此故說三種平等。此義應知。(身下丹本有見字)

何者七種具足煩惱染性眾生?一者求勢力人;二者求聲聞解脫人; 三者大乘人;四者有定人;五者無定人;六者集功德人;七者不集 功德人。

何等七種增上慢心?云何七種譬喻對治?一者顛倒求諸功德增上慢心,謂世間中諸煩惱染熾然增上,而求天人勝妙境界有漏果報;對治此故,為說火宅譬喻應知。

二者聲聞一向決定增上慢心,自言我乘與如來乘等無差別,如是倒取;對治此故,為說窮子譬喻應知。

三者大乘一向決定增上慢心,起如是意:無別聲聞、辟支佛乘,如是倒取;對治此故,為說雲兩譬喻應知。

四者實無謂有增上慢心,以有世間三昧三摩跋提,實無涅槃生涅槃想,如是倒取;對治此故,為說化城譬喻應知。

五者散亂增上慢心,實無有定,過去雖有大乘善根而不覺知,不覺 知故不求大乘,狹劣心中生虛妄解謂第一乘,如是倒取;對治此 故,為說繫寶珠譬喻應知。

六者實有功德增上慢心, 聞大乘法取非大乘, 如是倒取; 對治此故, 為說輪王解自髻中明珠與之譬喻應知。

七者實無功德增上慢心,於第一乘不曾修集諸善根本,聞第一乘心中不取以為第一,如是倒取;對治此故,為說醫師譬喻應知。第一人者,示世間中種種善根三昧功德方便令喜,然後令入大涅槃故。第二人者,以三為一,令入大乘故。第三人者,令知種種乘諸佛如來平等說法,隨諸眾生善根種子而生芽故。第四人者,方便令入涅槃城故。涅槃城者,所謂諸禪三昧城故。過彼城已,然後令入大涅槃城故。第五人者,示其過去所有善根令憶念已,然後教令入三昧故。第六人者,說大乘法,以此法門同十地行滿,諸佛如來密與授記故。第七人者,根未淳熟為令熟故,如是示現得涅槃量。為是義故,如來說七種譬喻。何者三種無煩惱人三種染慢?所謂三種顛倒信故。何等為三?一者信種種乘異;二者信世間涅槃異;三者信彼此身異。為對治此三種染慢,故說三種平等應知。

何者名為三種平等?云何對治?一者乘平等,謂與聲聞授菩提記,唯一大乘無二乘故,是乘平等無差別故。二者世間涅槃平等,以多寶如來入於涅槃,世間、涅槃彼此平等無差別故。三者身平等,多寶如來已入涅槃復示現身,自身他身法身平等無差別故。如是三種無煩惱人染慢之心,見彼此身所作差別,不知彼此佛性法身悉平等故,謂即此人我證此法故,彼人不得此對治故,與諸聲聞授記應知。

問曰:彼聲聞等,為實成佛故與授記?為不成佛與授記耶?若實成佛,菩薩何故於無量劫修集無量種種功德?若不成佛,云何與之虛妄授記?答曰:彼聲聞等得授記者,得決定心,非謂聲聞成就法性如來。依彼三種平等說一乘法,以佛法身、聲聞法身平等無異故與授記,非即具足修行功德。是故菩薩功德具足,諸聲聞人功德未足。

言授記者,六處示現,五是佛記、一菩薩記。如來記者,謂舍利弗大迦葉等眾所知識,名號不同故別與記。富樓那等五百人千二百等同一名故,俱時與記。學無學等皆同一號,又復非是眾所知識,故同與記。如來與彼提婆達多授別記者,示現如來無怨惡故。與比丘尼及諸天女授佛記者,示現女人在家出家修菩薩行皆證佛果,故與

授記。菩薩記者,如下〈不輕菩薩品〉中示現應知。「禮拜讚歎作 如是言:我不輕汝,汝等皆當得作佛」者,示現眾生皆有佛性故。 言聲聞人得授記者,聲聞有四種:一者決定聲聞;二者增上慢聲 聞;三者退菩提心聲聞;四者應化聲聞。二種聲聞如來授記,謂應 化者、退已還發菩提心者。若決定者、增上慢者二種聲聞,根未熟 故不與授記。菩薩與授記者,方便令發菩提心故。 又依何義,佛說三乘名為一乘?依同義故,授諸聲聞大菩提記。言 同義者,以佛法身、聲聞法身彼此平等無差別故。以諸聲聞辟支佛 等乘不同故有差別,以彼二乘非大乘故,如來說言不離我身是無上 義,一切聲聞辟支佛等二乘法中不說此義,以其不能如實解故。以 是義故,諸菩薩等行菩薩行非為虛妄。無上義者,自餘經文明無上 義,無上義者略有十種,此義應知。何等為十?一者示現種子無上 故,說雨譬喻。「汝等所行是菩薩道」者,謂發菩提心退已還發 者,前所修行善根不滅、同後得果故。二者示現行無上故,說大通 智勝如來本事等。三者示現增長力無上故,說商主譬喻。四者示現 令解無上故,說繫寶珠譬喻。五者示現清淨國土無上故,示現多寶 如來塔。六者示現說無上故,說解髻中明珠譬喻。七者示現教化眾 生無上故,地中踊出無量菩薩摩訶薩等。八者示現成大菩提無上 故,示現三種佛菩提故:一者示現應佛菩提,隨所應見而為示現, 如經「皆謂如來出釋氏宮,去伽耶城不遠,坐於道場得成阿耨多羅 三藐三菩提」故;二者示現報佛菩提,十地行滿足得常涅槃證故, 如經「善男子!我實成佛已來無量無邊百千萬億那由他劫」故;三 者示現法佛菩提,謂如來藏性淨涅槃常恒清涼不變等義,如經「如 來如實知見三界之相,次第乃至不如三界見於三界」故。三界相 者,謂眾生界即涅槃界,不離眾生界有如來藏故。「無有生死若退 若出」者,謂常恒清涼不變義故。「亦無在世及滅度」者,謂如來 藏真如之體,不即眾生界、不離眾生界故。「非實非虛非如非異」 者, 謂離四種相, 有四種相者是無常故。「不如三界見於三界」 者,謂佛如來能見能證真如法身,凡夫不見故。是故經言「如來明 見無有錯謬」故。「我本行菩薩道今猶未滿」者,以本願故,眾生 界未盡,願非究竟故。言未滿,非謂菩提不滿足也。「所成壽命復 倍上數工者,此文示現如來命常,善巧方便顯多數故,過上數量不 可數知。「我淨土不毀而眾見燒盡」者,報佛如來真實淨土第一義 諦之所攝故。九者示現涅槃無上故,說醫師譬喻。十者示現勝妙力 無上故,自餘經文示現應知。多寶如來塔示現一切佛土清淨者,示

現諸佛實相境界中種種諸寶間錯莊嚴故。示現有八:一者塔;二者量;三者略;四者住持;五者示現無量佛;六者離穢;七者多寶;八者同一塔坐。塔者,示現如來舍利住持故。量者,方便示現一切

佛土清淨莊嚴,是出世間清淨無漏善根所生,非是世間有漏善根之 所生也。略者,示現多寶佛身一體攝取一切諸佛真法身故。住持 者,示現諸佛如來法身自在力故。示現無量佛者,示現彼此所作諸 業無差別故。遠離穢者,示現一切諸佛國土平等清淨故。多寶者, 示現一切諸佛國土同實性故。同一塔坐者,示現化佛非化佛,法佛 報佛等皆為成大事故。

自此已下,示現法力、持力、修行力應知。

法力者,五門示現:一者證門;二者信門;三者供養門;四者聞法門;五者讀誦持說門。

〈彌勒菩薩品〉中示現四門,〈常精進菩薩品〉中示現一門。〈彌勒菩薩品〉中四法門者:一是證門,如經「我說是如來壽命長遠,時六百八十萬億那由他恒河沙等眾生得無生法忍」故。此言無生法忍者,所謂初地證智應知。八生乃至一生得阿耨多羅三藐三菩提者,謂證初地菩提法故。八生一生者,謂諸凡夫決定能證初地故。隨力隨分,八生乃至一生皆證初地故。此言阿耨多羅三藐三菩提者,以離三界分段生死,隨分能見真如法性名得菩提,非謂究竟滿足如來方便涅槃也。

二是信門,如經「復有八世界微塵數眾生皆發阿耨多羅三藐三菩提 心」故。三、供養門,如經「是諸菩薩摩訶薩得大法利,時於虚空 中雨曼陀羅華如是等」故。四、聞法門,如〈隨喜品〉所說應知。 〈常精進菩薩品〉中一法門者,謂讀誦解說書寫等,得六根清淨。 如經「若善男子善女人受持《法華經》,若讀若誦若解說若書寫, 是人當得八百眼功德,次第乃至得千二百意功德,故。此得六根清 淨者,謂諸凡夫以經力故得勝根用,未入初地菩薩正位,此義應 知。如經「以父母所生清淨肉眼見于三千大千世界」如是等故。又 六根清淨者,於一一根中悉能具足見色、聞聲、辨香、別味、覺 觸、知法,諸根互用此義應知。眼所見者聞香能知,如經「釋提桓 因在勝殿上五欲娛樂乃至說法」故。聞香知者,此是知境,以鼻根 知故。持力者,有三法門示現持力,如〈法師品〉、〈安樂行品〉 等廣說。法力,如經應知。「其心決定知水必近」者,受持此經得 佛性水成阿耨多羅三藐三菩提故。修行力者,五門示現:一者說 力;二者行苦行力;三者護眾生諸難力;四者功德勝力;五者護法 力。說力者,有三法門〈神力品〉示現:一者出廣長舌令憶念故; 二者謂謦欬聲說偈令聞故,令聞聲已如實修行不放逸故;三者彈指 覺悟眾生,令修行者得覺悟故。行苦行力者,〈藥王菩薩品〉示 現。

又行苦行力者,〈妙音菩薩品〉示現教化眾生故。護眾生諸難力者,〈觀世自在菩薩品〉、〈陀羅尼品〉示現。功德勝力者,〈妙

莊嚴王品〉示現,二童子依過去世功德善根有如是力故。護法力者,〈普賢菩薩品〉及後品示現。

又言「受持觀世自在菩薩名號,若人受持六十二億恒河沙等諸佛名號福德等」者,有二種義:一者信力故;二者畢竟知故。信力者有二種:一者我身如彼觀世自在無異,畢竟信故;二者調於彼生恭敬心,如彼功德我亦如是畢竟得故。畢竟知者,謂能決定知法界故。言法界者,名為法性。彼法性者,名為一切諸佛菩薩平等法身。平等身者,真如法身,初地菩薩乃能證入。是故受持六十二億恒河沙等諸佛名號,有能受持觀世自在菩薩名號,所得功德無差別。第一〈序品〉示現七種功德成就,第二〈方便品〉有五分示現破二明一,餘品如向處分易解。

妙法蓮華經憂波提舍卷下

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".